

正學啟蒙三字頌註

陳慧昶題



普爲出資及讀誦受持展轉流通者

回向偈曰

願以此功德

消除宿現業

增長諸福慧

圓成勝善根

所有刀兵劫

及與飢饉等

悉皆盡除滅

人各習禮讓

一切出資者

展轉流通者

現眷咸安樂

先亡獲超昇

風雨常調順

人民悉康甯

法界諸含識

同證無上道

民國二十一年七月二版三千

正學啓蒙三字頌箋註一冊

流通處

弘化社

藏版處

蘇州護龍街南段
弘化社
穿心街報國寺內

印刷者

上海新大沽路丁四十號
國光印書局
電話三三七四三號

弘化社流通書籍規約

世變日亟。人類之良知盡喪。法道垂秋。修治之正軌愈晦。匡扶挽救。端賴羣賢。宣揚正誼。其惟典籍。當代尊宿。印光大師。道高德邵。縉素欽崇。歷年印行書籍。不下二十餘種。流布於四方者。何止數十萬冊。讀其書而獲其益者。更何可以數量計哉。茲者大師德臘已高。謝絕諸緣。滅踪息影。臨行之日。乃命其侍者。將所存板籍。悉數歸公。貢諸于世。復由諸同仁。募義樂助。認定年捐。特設專社。繼續流通。以竟大師未竟之弘願。惟是組織伊始。基本未充。故於流通規約。略示限度。未能盡量贈與。殊抱慊忱。俟將來因緣湊合。再圖推廣。諸希垂亮。至爲厚幸焉。

(一) 照本流通

本社印存各種書籍。如有備價來請者。一律照本讓與。凡經本部鑑定之書籍。如有發心附印者。本部當爲代勞。但附印書價。須請先惠。

(二) 半價流通

凡機關團體名義。半價購請者。得以半價組書籍。每種一部付與。若以個人名義。半價購請者。得於半價組書籍內。任選兩種。每種一部。如個人欲得二種以上機關團體。欲得半價組以上者。均須照本繳價。

(三) 全贈流通

凡以機關團體名義索請者。得以全贈組書籍。每種一部贈與。若以個人名義索請者。得於全贈組書籍內。任選三種。每種一部。如個人欲得三種以上。機關團體欲得全贈組以上者。均須照本繳價。以上三項如須郵寄一律照加郵費。凡有志研究。而絀於資力者。本社當審察情形。方便贈與。以滿其願。

(附則)

正學啓蒙三字頌自序

宋王應麟著三字經。風行於世。家習而戶知之。其爲書也。專以儒而通於俗。明西蜀吹萬老人著釋教三字經。清楊仁山居士著佛教初學課本。亦三字爲句。是二書也。體大矣。以其專於述佛。而行之未廣。夫童子者。教之善。則爲聖賢之所基。教之不善。則爲愚不肖之所自。不可以不慎也。王陽明先生曰。天下之大亂。由虛文勝而實行衰也。深慨六朝唐宋以來。士習詞章。務文棄實。俗學之弊久矣。歐化乘虛而入。變本加厲。毀聖廢經。人道淪亡。於今尤甚。因絜矩正學。取便啓蒙。輯爲之頌。上篇述佛。中篇述孔老。下篇述歷代學史之要。三字爲句。便以習熟。深入識田。爲金剛種。永而不壞。若夫抽苗聳幹。敷花成實。則有俟夫糞溉之力。雨暘之加。而時日之至焉。書成。以呈普陀印光法師。師可之。加點定焉。齊用修居士相從講論者一年。發願爲箋註。以備教者學者之參考。予因而損益之。而以各門精要應讀之書。附見於次。斯頌之旨。則儒釋互闡。解行互策。德業兼修。教養兼籌。男女俱教。老少俱勉。人物一體。事理一如。文字與義理相需。道學與科學互佐。世法與出世法雙詮。如人眼耳鼻舌身意六

根無所偏主偏缺庶幾具體之云也。夫自童子不得養正之教而壯而老而未免於蒙者比比然也。得是編而求之以自進於無疆將爲泰山此則一簣將爲巨海此則一杯長夜之行此則一燈其亦無棄焉而豈能限之哉。婺源陽復子江謙敘於時民國十九年庚午孟秋月也。

正學啓蒙三字頌發刊序

人同此心心同此理生佛不二凡聖一如儒釋聖人先得吾心之所同然。愍衆生迷而未悟莫得受用。由是各垂言教以啓迪之。期其各得親證此理。又復以先覺覺後覺也。然儒主經世故其說注重倫常。于心性極致不過略示端倪而已。若能研究佛學有所悟會則卽倫常日用無不一真畢露。左右逢源。故古今來建大功立大業精忠貫日月浩氣塞天地者多從學佛得力而來。所謂不知佛法莫由知儒不知出世之妙莫由經世也。釋主出世故舉世間倫常與心性極致一一徹底發揮。隨機施教對證發藥。俾一切衆生各隨其機而得實益。以故遇父言慈遇子言孝兄友弟恭夫和婦順主仁僕忠一一示其前因現果現因後果使人欲爲惡而有所不敢欲不爲

善而有所不能。儻人各知此義。有不彛倫攸敘。天下太平乎哉。此殆佛教人乘天乘法耳。其效尙能如是。若聲聞緣覺菩薩佛乘之利益。又何可得而測量者哉。所惜宋儒量小。由學佛法。得知聖人之心法。欲推尊儒教。反從而闢駁佛法。其所闢駁者。實爲令人誠意正心。盡誼盡分之根本。如三世因果六道輪迴。此天下古今之實理實事。人若知此。何敢違心悖理。以取罪戾。致未來墮不如意處。則不期然而正心誠意。盡誼盡分矣。宋儒謂佛以因果報應生死輪迴。誘惑愚俗。不知人稟天地之氣以生。及其已死。則形既朽滅。魂亦飄散。縱有刑罰。將何所施。誤謂一死永滅。成大邪見。以一傳諸貽害後世。太悖聖人原始返終。故知死生之說。精氣爲物。游魂爲變。是故知鬼神之情狀之義。由是好邪之輩。敢于爲惡。以一死永滅。堯桀同歸于盡。又何必繩趨尺步。受此拘束。以致徒勞一生。又何不肆志縱情。隨意所爲。以享自由自在之幸福乎。因茲善無以勸。惡無以懲。彼此效尤。以致成此廢經廢倫之現象。在彼本意。恐提倡因果報應生死輪迴。人必多歸于佛。故特闢駁以關閉之。令人無由趣入。庶可儒教興盛。永久無替。而不知反將聖人之道。由此滅沒。可不哀哉。婺源江易園居士。

宿植德本。品粹學優。初則專宗程朱。不知佛爲何如人。後以閱歷既深。拘見漸消。試閱佛經。則如登泰山。徧觀四虛。心神暢悅。非言可喻。始知先儒以門庭知見。俾後世不沾法利。不勝痛惜。于是隱居家鄉。依之修持。一鄉之人。悉從其化。又思啓迪後來。俾得實益。因作三字頌。略述儒佛立教覺世之大旨。并歷史諸子之綱要。庶學者不被前人門庭語言所誤。而同得以盡倫學儒。盡性學佛。經世出世。合而爲一。明明德。以止至善。無所住而生其心。不著一法。具修衆善。永離四相。圓彰萬德。證吾心本具之法。續如來所得之道。遠令先聖暢懷。近爲宋儒補過。其爲功德。實非淺鮮。門下士齊用修。又爲之註。俾閱者一目瞭然。李圓淨居士特爲排印。祈余作序。以冀廣傳。因不揣固陋。述其大略。願爲父兄及膺教育之職者。令諸子弟同讀誦之。則知在儒在釋。了無二道。經世出世。原是一法。因果明而心性自悟。彝倫敘而天下太平。此理勢所必然者。明眼人當不以余言爲河漢也。

民國二十年辛未仲春常慚愧僧釋印光撰

正學啓蒙三字頌

印光法師審定

江謙謹述

上篇 述佛

眞如性。無不善。眞不妄。如不變。無明熏性。光掩如雲。遮日不見。雲翳消。日光現。多生習。貪瞋癡。隨所遇。惡業滋。戒定慧。能破之。戒止惡。定止散。慧明心。習氣斷。性須悟。悟須學。解與行。功獨倬。先覺者。教後覺。天人師。莫如佛。三界尊。最高出。過現未。三大劫。各千佛。出應世。釋迦佛。當現劫。千佛中。屬第四。佛法身。莫能量。窮三際。徧十方。本無生。何有滅。隨因緣。示生滅。十方界。與三世。一切佛。悉如是。三覺圓。稱佛寶。五乘法。稱法寶。三乘僧。稱僧寶。



唯三寶。性常住。不見聞。由薄福。唯三寶。應歸依。諸惡業。得遠離。
成正覺。此爲基。佛教人。知因果。種善因。得福果。種惡因。則得禍。
因果報。三世該。或現在。或未來。有遲速。無可逃。因善惡。有輪迴。
天人神。三善道。畜鬼獄。三惡道。此六道。由心造。佛所戒。首五事。
不殺仁。不盜義。不淫禮。不妄信。不飲酒。斯爲智。修五戒。人道全。
破五戒。三途緣。修十善。則生天。回淨土。脫塵凡。身三惡。殺盜淫。
意三惡。癡貪瞋。若妄言。若綺語。若兩舌。若惡口。此四惡。口業成。
十惡止。十善行。生六道。皆凡夫。生淨土。稱聖徒。輪回苦。畢竟無。
佛菩薩。聖中尊。次緣覺。次聲聞。此四聖。合六凡。十法界。性一般。
修德殊。位差別。惟佛陀。淨三業。眼耳鼻。舌身意。內六根。須自治。

色聲香味觸法。外六塵。須解脫。根塵接。六識生。眼識色。耳識聲。鼻舌身。與意識。隨物誘。多外營。第七識。名末那。執我法。邪見多。阿梨耶。第八識。此如田。藏種子。藏淨染。入生死。主人翁。卽他是。染爲識。淨爲智。能轉識。卽成智。轉五識。成所作。轉意識。妙觀察。轉末那。平等性。轉梨耶。大圓鏡。此四智。成慧命。怒轉喜。同一心。罵轉讚。同一口。識轉智。猶反手。以智眼。觀五陰。色受想。與行識。一切法。因緣成。離爲滅。合爲生。如地水。與火風。此四大。合爲形。光與質。合爲影。當體空。無自性。所執著。皆假名。空假合。中觀成。是三觀。義至精。止觀法。如是行。心中念。鏡中影。念生滅。影無定。迷外緣。起惑病。惑造業。業受報。三障夢。何時醒。唯眞如。大圓鏡。

影常動。鏡常靜。心不動。念不靜。心無邊。念著境。念與心。不相應。如是觀。知佛性。是佛性。本平等。心與佛。及衆生。三無別。無減增。因是修。佛得成。佛方便。有多門。禪教律。三大宗。理事具。顯密通。禪一心。教多聞。律萬行。不可分。分則偏。合則融。最優異。淨土宗。專念佛。證圓通。觀相好。心色融。持名號。攝三根。阿彌陀。大願船。四十八。誓願堅。臨命終。憶念專。蒙接引。生寶蓮。分九品。攝愚賢。等四生。無擇焉。極樂國。不退轉。無衆苦。無惡緣。衣與食。皆自然。光與壽。皆無邊。寶徧地。花徧天。鳥說法。如佛言。樹妙音。如管絃。諸善人。會一處。何法門。不開悟。祇一生。補佛位。生西方。眞大利。佛護念。不思議。願修持。徧含識。有眞信。有篤行。有切願。定往生。

往生集聖賢錄。生西方。踵相續。教聲聞。說小乘。是權說。如化城。
四聖諦。十二緣。離苦海。息塵緣。但自度。不度生。以是義。稱小乘。
教菩薩。大乘經。發大心。度衆生。盡十方。無不徧。盡永劫。無時停。
文殊智。普賢行。以是義。稱大乘。若華嚴。最圓融。若佛頂。最微密。
若法華。若涅槃。開權小。顯真實。若圓覺。若金剛。稱頓教。談了義。
此六經。必須習。餘諸經。隨願力。或循環。或專一。必敬恭。必至誠。
能讀誦。兼解行。修淨土。上品生。於佛道。速得成。普賢尊。十願王。
三世佛。所稱揚。導海衆。歸樂邦。修行人。持勿忘。馬鳴尊。佛懸詔。
後佛生。說法要。起信論。何精妙。讚西方。進怯者。求大乘。生佛前。
常見佛。無退緣。既生西。得神通。十方刹。圓鏡中。天眼通。無不見。

天耳通。無不聞。神足通。能徧至。宿命通。能徧窮。他心通。知衆念。漏盡通。垢染空。得六通。證三身。等法界。稱法身。具相好。稱報身。隨類現。稱應身。如淨月。應萬川。本一月。影萬千。度自他。唯六度。捨慳貪。布施度。離穢惡。持戒度。息瞋恚。忍辱度。策懈怠。精進度。止散亂。禪定度。破愚癡。智慧度。菩薩行。此六具。慈與樂。悲拔苦。喜攝受。捨待化。四無量。成佛陀。佛示現。八相同。初說法。兜率宮。教諸天。護法門。次入胎。次住胎。示有生。與人同。七寶殿。母腹中。諸天人。來獻供。諸菩薩。來雲從。次出胎。住王宮。示處欲。離塵昏。次出家。次成道。示捨欲。能成佛。次受請。轉法輪。度衆生。利無窮。次圓寂。入涅槃。令悲仰。遭佛難。實不滅。住世間。佛一音。法一味。

根大小聞別異。分五時。喻五味。說華嚴第一期。如從牛出乳時。如初日照須彌。小根衆無聞知。說小乘第二期。乳出酪。接小機。如日照幽谷時。第三期。說大乘。成生酥。方等經。如食時。照高平。第四期。說般若。成熟酥。蕩諸著。日禺中。光昭灼。說法華。及涅槃。第五時。日影端。成醍醐。等涅槃。雖五味。乳一般。唯華嚴稱主經。法界觀最圓明。餘所說。眷屬經。機頓漸。法偏圓。圓人聽。偏亦圓。劣機聽。圓亦偏。一一切。一切一。如帝釋天網珠。影重重。互攝入。佛智慧難窮測。譬大海。此一滴。佛化東漢永平。夢金人。飛帝庭。往印度。遠求經。四二章。先譯成。文句義。簡而精。魏晉宋。逮明清。諸賢聖。前後興。或護法。或傳經。或疏釋。或淨行。十宗說。派別明。

經律論三藏宏。八千卷。光晶瑩。傳朝鮮。及東瀛。修史人。不聞佛。
遇佛事。多刪黜。誤衆生。迷大道。佛門衰。始清世。罷試經。免度牒。
欲弘法。反滋弊。粥飯僧。違佛制。闡提多。災禍接。獅子吼。冀自今。
息物競。和邦鄰。令普發。菩提心。勉之哉。龍象人。

中篇 述孔老

人倫教。孔聖詳。如日月。照萬方。人之本。不可忘。國之命。不可傷。
孝且弟。謹而信。汎愛衆。而親仁。有餘力。以學文。此小學。弟子箴。
明明德。稱大人。此明德。性之眞。無內外。無邊垠。無生滅。無古今。
融事物。唯一心。曰親民。止至善。曰致知。曰格物。曰誠意。曰正心。
名則異。義則均。曰慎獨。曰日新。曰孝悌。曰慈仁。曰愛敬。曰忠信。

事則異。理則均。有本末。有始終。知先後。感斯通。先修身。次齊家。次治國。平天下。身日修。物自化。各有身。各自修。位雖異。明德侔。但求己。毋他求。人有善。若己能。人有惡。若己過。薄責人。厚責我。本一身。末天下。本道德。末財貨。但培本。自榮末。同好惡。息爭奪。若教爭。成大禍。仁必興。暴必破。此大學。學無我。修圓因。趣圓果。天下公。兵革措。世大同。由心做。身不修。徒浪話。欺一心。亂天下。雖匹夫。成大錯。學不厭。教不倦。孔聖言。普賢願。願自他。同歸善。盡未來。如是念。一切聖。由此成。一切人。當共勉。古建國。教學先。師與道。最尊嚴。凡國人。聽命焉。國有學。國不危。家有學。孝悌慈。人有學。知禮儀。欲興教。須教女。胎有教。根有土。生聖人。皆聖母。

夫之賢由內助。明人倫。始夫婦。別內外。事相成。敬如賓。禮無瀆。
一婦賢。一家睦。家人教。利女貞。婦不順。多怨爭。古教女。崇四德。
貞而靜。曰婦德。莊而婉。曰婦言。重而溫。曰婦容。主中饋。能裁縫。
習紡織。曰婦功。教兒女。自童蒙。蒙養正。作聖功。兒始生。擇乳母。
兒稍長。擇鄰與。教之始。知名數。正聲音。正言語。釋名書。可採讀。
謹應對。職灑掃。知禮讓。知進退。進以禮。退以義。如是行。終身吉。
學小大。非一異。古十歲。學六書。學加減。及乘除。六書法。首象形。
次指事。次會意。此三者。義主形。復有三。卽諧聲。及假借。及轉注。
此三者。義兼聲。合六書。妙用宏。喉齶舌。及齒唇。此五部。聲韻根。
知通轉。別重輕。許氏書。說解明。識文字。乃讀經。稱至德。首孝經。